

Efangele Luke 1-3 gka Shekgalagari

LUKE 1

Tyumejho go Theofila

¹ Go Mototeshi Theofila: Batyho mba bantsi iye ba ineela go kwala polelo ya bilo ze iye za rihega mo gotjhwe. ² Ba kwala bilo ze iye ha bi nwa ke mba iye ba bi bona gka maro, le mba iye e le bariheri ba lehogko mo tshimologong. ³ Le nna, gka iye gka thothomisa ruri bilo zothe za tshimologo, iye ke bona ha go gka rula molemo go go kwalela gka tyhulaganyo. ⁴ Ke go kwalela she gore o ze gka thomamo bilo ze iye wa bi rutywa.

Kitsiso ya bozalo jhwa ga Johane wa Mokolobetsi

⁵ Iye iye ya re metheng ya ga Herote, kgoshi ya Jutea, ga be go le moperesiti nngwe go ruwa Sakaria, wa kgota ya ga Abija. Mosari wagwe iye e le kokomana ya ga Arone. Iye e bijhwa Elisabethe. ⁶ Iye ba le basiamme ha pele ga Morimo gka boberi jhwabo. Be obamela rityaolo jhothe le melao ya Morena, be si na molatyo. ⁷ Mbe iye be si na motyhwana, gka Elisabethe iye e le moopa, be bile ba see iye ba ogarihala tyhatya gka boberi jhwabo.

⁸ Leatji lengwe ga rihala gore Sakaria a rihe tyiho ya boperesiti ha pele ga Morimo. Iye e le nako ye kgota yagwe e tjhwanee go riha jhwalo. ⁹ Gka ha towelong ya boperesiti, a thotjhwa go ya go hesa maswalo mo tempeleng ya Morena. ¹⁰ Bontsi jhothe jhwa be bo rapela ba le gkaite gka nako ya go heswa ga maswalo.

¹¹ Mbe ga bonana goye moengele wa Morena, e eme gka ha ntheng ya lebogo le le siamego la shebesho sha maswalo. ¹² Ya re Sakaria e mbona a guruega, le poiho ya mo wela. ¹³ Moengele a mo raya a re: “Sakaria, o shegka wa weiha gka gore tyhapelo yago iye ya uzwiwa. Mosari wago Elisabethe o da go belega motyhwana wa mhantjana, mbe o mbijhe Johane. ¹⁴ O da go nere boityumelo le boipelo mo gonye, le batyho mba bantsi ba da go ityumelela go zalwa gagwe. ¹⁵ Gka gore o da go rula motyona mo ponong ya Morena. Ha ngkagke a nwa bogyalwa jhwa mofine, le ha e le bogyalwa jho bo bogale. O da go dala Moya wo o Boitshepo go jhwa mo shebopelong sha ga nnale. ¹⁶ Batyho mba bantsi ba lseraele o da go ba botsejha Moreneng Morimo wabo. ¹⁷ O da go shepela ha pele ga

Morena gka moya le gka nonoho ya ga Elija. O da go kopanya batyhwana le basejhwe, mbe a hetyole mba ba sha uzwego go shepela bothaleng jhwa basiamme. O da go riha jhwalo go baakanyejha Morena shetjhaba shagwe go mo amoshela.”

¹⁸ Sakaria a raya moengele a re: “Ke da go ze jhwang she, gka ke le monnamogolo le mosari wagka e ogarihee tyhatya?”

¹⁹ Moengele a mo hetyola a re: “Too nna Gaberiele, yo ke eme ha pele ga Morimo. Iye gka rongwa go da go bola lewo, le go go jhwela mahogko uwa, a boityumelo. ²⁰ Bona, o da go rula shemumu, o palelwa ke go bola, gka ha o rumele mahogko agka, uwa a da go rihega mo lobagkeng lwawo. O da go rula shemumu go hitha leatji le bilo ze bi da go rihega gkalo.”

²¹ Mbe batyho ba be be labelee Sakaria. Ba kgakgamalela gore ke shing nde a riyega mo tempeleng. ²² Ya re e jhwa, a palelwa ke go bola nabo. Ba lemoga ha nde a bona ponatshegelo mo tempeleng. A rula a ba gkopa, mbe a helela heri e le shemumu.

²³ Ga rihala, ya re malatji a tyihelo yagwe e see iye a hetya, a ya gaya.

²⁴ Iye ya re mojhwa ga malatji uwong, Elisabethe mosari wagwe a ityhwalwa, mbe a iphira rikgweri jhe ri thano, a re: ²⁵ “Morena iye a ntyihela jhwalo. Metheng ye o ntyabile gkayo go dosha kgobo yagka ha pele ga batyho.”

Kitsiso ya bozalo jhwa ga Jesu

²⁶ Iye ya re gka kgweri ya boratyaro ya boimana jhwa ga Elisabethe, moengele Gaberiele a rongwa ke Morimo mozeng wa Galilea, wo o bijhwa Nasaretha. ²⁷ A ya kgarejhwanaeng ye e mbeelejhwe ke monona yo o bijhwa Josefe, wa kgota ya ga Dafite. Kgarejhwana iye e bijhwa Maria.

²⁸ Moengele a tjena goye, a mo raya a re: “Rumela weni yo o shego tyhatya, Morena o na lewo.”

²⁹ Maria a guruiwa tyhatya ke lehogko la moengele, a ipojha gore tyumejho ye e raya shing. ³⁰ Moengele a mo raya a re: “O shegka wa weiha Maria, gka gore iye wa bona leshego Morimong. ³¹ Bona, o da go ityhwalwa, mbe o belege motyhwana wa mhantjana, o mbijhe Jesu. ³² O da go rula mogolo, mbe a bijhwe Morwa Mogorimorimo. Morena Morimo o da go mo naya shetyulo sha bogoshi sha ga segolwe Dafite. ³³ O da go busa itu ya ga Jakobe gka boshakhutheng. Bogoshi jhwagwe ha bo gkagke jhwa rula le bokhutho.”

³⁴ Maria a raya moengele a re: “She she da go rihega jhwang, gka ke sha ze monona?”

³⁵ Moengele a mo hetyola a re: “Moya wo o Boitshepo o da go da mo gowo, le nonoho ya Mogorimorimo e da go go ogkama. Mbe gka nthā ya she, motyhwana yo o da go mbelega, o da go bijhwa boitshepo, Morwa Morimo. ³⁶ Bona, Elisabethe wa loshitja lwago, le ena o ityhwee motyhwana wa mhantjana mo boogaring jhwagwe. Kgweri ye ke ya boratyaro yagwe, ena yo iye e bijhwa moopa. ³⁷ Gka gore ha go na shengwe she she gka palela Morimo.”

³⁸ Mbe Maria a re: “Bona, ke lelatya la Morena. A go ntyihagalele jhwaagka lehogko lago.” Gyaanong moengele a mo siya.

Maria o etyela Elisabethe

³⁹ Iye iye ya re metheng yeyong Maria a nanoga, a ithaganelela lehatsheng la makgabana, mozeng mongwe wa Juta. ⁴⁰ A tjena mo itung ya ga Sakaria, a rumejha Elisabethe. ⁴¹ Ga rihala ya re Elisabethe e uzwa tyumejho ya ga Maria, motyhwana a tola mo shebopelong shagwe. Elisabethe a dala Moya wo o Boitshepo. ⁴² A bola gka lezwe le letyona a re: “O shego mbasaring, go bile go shego loungo lwa shebopelo shago. ⁴³ She, ke shing she ntyihagalela, ha gyaanong na Morena wagka a gka da mo gono? ⁴⁴ Gka gore bona, ha lezwe la tyumejho yago le tjena heri mo ritjebeng jhagka, motyhwana a be e tola gka boityumelo mo shebopelong shagka. ⁴⁵ Go shego ena mosari, yo iye a rumela, gka gore bilo ze iye wa bi jhwelwa ke Morena bi da go rihega.”

Shehela sha ga Maria sha kgalalejho

⁴⁶ Mhong Maria a re:

“Moya wagka o gorisa Morena,

⁴⁷ moya wagka o bile nda wa ityumela
Morimong Mbologki wagka.

⁴⁸ Gka gore nda a laba bobotana
jhwa lelatya lagwe.

Bona, go jhwa hombe loshitja lothe
lo da go mpijha moshegohariwa.

⁴⁹ Gka gore Yo o tyhatya
nda a ntyihela bilo ze bityona.
Lebijho lagwe le boitshepo.

⁵⁰ Bouzwezoborogko jhwagwe

bo mo go mba ba mboihago,
mo loshitjeng lothe.

⁵¹ Nda a supa nonoho

gka lebogo lagwe.

Nda a halajha mba ba ikgorisa

mo rikakanyong

jha ripelo jhabo.

⁵² Nda a osa rikgoshi jhe rityona

mo bityulong zabo za bogoshi,

mbe nda a gorisa batyho

mba ba nyatseshilego.

⁵³ Mba ba bolawa ke tala

nda a ba tjhorisa

gka bilo ze bi molemo.

Bagumi nda a ba shekejha

ba iphothere heri.

⁵⁴ Nda a tywisa lseraele

mothanka wagwe,

gore a gagkoloshelwe

bouzwezoborogko jhwagwe.

⁵⁵ Jhwaagka iye a bola le botatetjhwe,

gka ga Aberahame le loshitja lwagwe

gka bosakhutheng.”

⁵⁶ Maria a rula nae rikgweri ri gka rula rityharo, a be e boyela gagwe.

Bozalo jhwa ga Johane wa Mokolobetsi

⁵⁷ Lobagka lwa ga Elisabethe la da, lwa go belega, mbe a belega motyhwana wa mhantjana. ⁵⁸ Baagisanyi le bagobo ba uzwa ha Morena iye a mo uzweza borogko. Ba ityumela nae.

⁵⁹ Gka leatji la boheraboberi ba da go rupisa motyhwana, mbe ba re ba mbijha Sakaria, lebijho la ga ise. ⁶⁰ Mbe nnale a ba hetyola, a re: “Nnyaa, ha go njhe jhwalo. O da go bijhwa Johane.”

⁶¹ Ba mo raya ba re: “Ha go na nngwe wa loshitja lwago yo o bijhwa gka lebijho leleyong.” ⁶² Ba gkopa ise, go ze gore o ratya motyhwana a bijhwe anye.

⁶³ Sakaria a lopa lejhwe le le kwalelago, mbe a kwala a re: “Lebijho lagwe

ke Johane.” Ba kgakgamala bothe. ⁶⁴ Molomo wagwe wa momologa gka bojhogko, le letshotsho lagwe la bohonoga, mbe a bola, a baka Morimo.

⁶⁵ Poiho ya wela bothe mba ba jhoshile mo tyikologong yabo. Ripolelo jhe jhothe, jha bolwa mo lehatsheng lothe la makgabana la Jutea. ⁶⁶ Bothe mba iye ba uzwa bilo ze, ba bi tshola gka pelo ba re: “Kana motyhwana yo, e da go rula yo o njhe jhwang!” Gka gore sheata sha Morena iye she na nae.

Leboko la ga Sakaria

⁶⁷ Mhong Sakaria, ise, a dala Moya wo o Boitshepo, mbe a porofita, a re:

⁶⁸ ”A go bakwe Morena

Morimo wa Iseraele,

gka gore nda a da go tywisa batyho bagwe,

le go ba golola.

⁶⁹ Nda a romela mbologki yo motyona mo gotjhwe

mo itung ya ga Dafite

mothanka wagwe.

⁷⁰ Iye a bola

gka melomo ya baporofiti bagwe

mba ba boitshepo,

go jhwa metheng ya bogologolo,

⁷¹ gore he gololwe mbabeng betjho,

le mo tyhatyeng ya bothe

mba ba he ilago.

⁷² A re o da go uzweza

botatetjhwe borogko

le gore a gagkoloshelwe

kgolagano ye e boitshepo yagwe.

⁷³ Iye a riha maikano le

tatetjhwe Aberahame,

⁷⁴ go he golola

mo biateng

za baba betjho,

gore he mo rihele he si na poiho,

⁷⁵ gore he rule boitshepong le mo tshiamong

ha pele gagwe,

gka malatji othe

a botjhelo jhwetjho.

⁷⁶ Ee, le weni motyhwana,
o da go bijhwa moporofiti
wa Mogorimorimo,
gka gore o da go shekela
ha pele ga shehathego sha Morena
go baakanya ritsela jhagwe,

⁷⁷ o neye batyho bagwe
kitso ya pologko
gka boitjhwarelo jhwa ribe jhabo.

⁷⁸ Gka nthā ya bouzwezoborogko
jho bo bonolo
jhwa Morimo wetjho,
pologko e da go da mo gotjhwe
jhwaagka leseri le legolo go jhwa legorimong.

⁷⁹ Le da go phatshimela
mba ba njhe mo lehihing
le moritying wa losho,
go keejha rinoo jhetjho go ya
mo tseleng ya kagiso.”

⁸⁰ Mbe motyhwana a gola, a nonoha moyeng. A rula mo rinageng go ya
go hitha mo lobagkeng lwa go itshupa gagwe mo lseraele.

LUKE 2

Bozalo jhwa ga Jesu

(Math 1:18-25)

¹ Iye iye ya re metheng yeyong ga jhwa tyaolo go Kaesare Aguseto, gore
lehatshe lothe le kwalwe. ² Go kwalwa mma ga nthā, ke mma go rihwe gka
Kuirinio a le molaori wa Siria. ³ Mbe bothe ba ya go kwalwa, nngwe le
nngwe a ya mozeng wa i gobo.

⁴ Josefe le ena a thathoga e jhwa Galilea, e jhwa mozeng wa Nasaretha,
e ya Jutea mozeng wa ga Dafite, wo o bijhwa Bethlehemā, gka e le wa
kgota le wa loshitja lwa ga Dafite. ⁵ E ya go kwalwa le Maria, mosari yo iye
e mbeelerijhe, e bile e ityhwee. ⁶ Ga rihagala ya re ba sha i gkayo, ga hitha

malatji a o da go belega^a gkawo. ⁷ Mbe a belega motyhwana wa mhantjana wagwe wa ntha, a mo phutyhela gka bibatya. A mbaya bogyelong jhwa ripeze, gka gore iye go si na borulo mo itung ya baweng.

Barisa le Baengele

⁸ Ga be go le barisa mo nageng, mo lehatsheng le leyong, be lesijhe letsomane gyabo bosigo. ⁹ Moengele wa Morena a ema ha gobo, le kgalalelo ya Morena ya boneshela ntheng jhothe jhabo. Mbe ba weiha gka poiho ye tyona. ¹⁰ Moengele a ba raya a re: “She weihe, bona, ke le jhwela mahogko uwa a molemo, a boityumelo jho botyona, jho bo da go rihagalela batyho bothe. ¹¹ Gka gore hombe mozeng wa ga Dafite iye la zalelwa Mbologki, yo e leng Keresete Morena. ¹² She e da go rula shesupo mo gonye. Le da go hithela motyhwana a le mo phutyhelwe gka bibatya, a le mo lajhwe mo bogyelong jhwa ripeze.”

¹³ Gka tjhoganejho gka moengele e bile e na le bontsintsi jhwa leshomoshomo jhwa legorimo, be baka Morimo be re: ¹⁴ “Kgalalelo e rule Morimong bogorimorimong, le kagiso e rule mo lehatsheng, mbatyhong mba O ba ityumelelayo.”

¹⁵ Ga rihagala ya re baengele be sina go ba siya be ya legorimong, barisa ba raana ba re: “A he ye heri jhwa Bethelehema, he bone shelo she, she she rihageego she Morena O she he jhwelayo.” ¹⁶ Ba da gka bojhogko. Ba hithela Maria le Josefe, le motyhwana a le mo lajhwe mo bogyelong jhwa ripeze. ¹⁷ Ya re ba sina go bona, ba jhwela batyho mo ntheng jhothe lehogko le ba le ba jhwelwe gka ga motyhwana yo. ¹⁸ Mbe bothe mba nde ba uzwa ba kgakgamajhwa ke bilo ze barisa nde ba bi ba jhwela. ¹⁹ Mbe Maria a bologka ripolelo jhothe jhe, a ri akanya mo pelong yagwe. ²⁰ Barisa ba boya ba galalejha Morimo, ba O baka gka ntha ya bilo zothe ze iye ba bi uzwa le ze iye ba bi bona, heri jhwaagka ba le ba bi jhwelwe.

Tyhupiso ya ga Jesu

²¹ *Ya re malatji uwa a heraboberi a go rupisa motyhwana e see iye a hetya, a bijhwa Jesu, lebijho le iye le hiwa ke moengele a ise a ingwe mo shebopelong.

^a2.6 kana bebi

*2:21 Lef 12:3; Luke 1:31

Jesu o isiwa tempeleng

²² * Ya re malatji a bontahajho jhwabo e see iye a hetya, gka ha molaong wa ga Moshe, ba mo isa Jerusalema go mo ha Morena, ²³ * jhwaagka go le go kwalwe mo molaong wa Morena ga ruwa: “Mhantjana nngwe le nngwe wa ntho o da go bijhwa moitshepi wa Morena.” ²⁴ Gatshi ba isa sherabelo jhwaagka iye ga bolwa molaong wa Morena, “maphoi a le maberi, le ha e le maphoyana a le maberi.”

²⁵ Ga be go le monona nngwe mo Jerusalema, lebijho lagwe go ruwa, Simeone. Monona yo a be a siame, e le moraperi wa Morimo, e letyile kgomotso ya Iseraele. Mbe Moya wo o Boitshepo wa be o le mo goye.

²⁶ Moya wo o Boitshepo iye o mo shenolee gore o da go bona Keresete wa Morena pele e swa. ²⁷ Mbe e gogwa ke Moya go ya tempeleng. Ya re bazari be nere motyhwana Jesu go mo rihela gka ha towelong ya molao, ²⁸ mhong a mo teya gka mabogo agwe, a baka Morimo a re: ²⁹ “Morena, gyaanong o naya mothanka wago tsela gka ha lehogko lago, go dogo gka kagiso. ³⁰ Gka gore maro agka iye a bona pologko yago, ³¹ ye iye wa e baakanya ha pele ga shehathago sha ritjhaba jhothe, ³² leseri le le bonesha Baritjhaba, le kgalalelo ya Iseraele batyho bago.”

³³ Mbe ise le nnale ba kgakgamalalela bilo ze bi bolwa gkaye.

³⁴ Gyaanong Simeone a ba shegohajha, a raya Maria nnale a re: “Bona, motyhwana yo o bee go wa le go zoga ga batyho mba bantsi mo Iseraele, le gore a rule shesupo she she da go ganyejha. ³⁵ Ee, le tjhaka e da go phunyelejha moyeng wago, gore she batyho mba bantsi ba she akanya mo ripelong jhabo, she shenoge.” ³⁶ Ga be go le nngwe go ruwa, Ana, moporofiti wa shesari, morwariya Fanuele wa lotso lwa Ashere. A be e ogarihee tyhatya, mbe iye nkile a rula le monona gka ringwaga jhe risupa go jhwa bokgarebeng jhwagwe.

³⁷ Iye e ele motholagari yo iye e gka rula ringwaga jhe ri 84, yo iye e sha jhwe mo tempeleng, e rihela Morimo gka go ityima go gya le gka merapelo bosigo le shegkau. ³⁸ A da heri gka lobagka lo loyong, a leboga Morimo, a bola gka motyhwana le batyho bothe mba ba labelee tyhegkololo ya Jerusalema.

* 2:22-24 Lef 12:6-8

* 2:23 Ekes 13:2,12

Ba boyela Nasaretha

³⁹ Ya re be see iye ba riha bilo zothe gka ha molaong wa Morena ba boyela Galilea, mozeng wa i gobo wa Nasaretha. ⁴⁰ Motyhwana a gola, a nonoha a dala bothale; le tshegohajho ya Morimo ya rula mo goye.

Mhantjana Jesu mo tempeleng

⁴¹ * Jhwa, bazari ba ga Jesu iye be ne be ya Jerusalema gka ringwaga jhothe, be ya morihong wa Tolaganyo. ⁴² Iye ya re Jesu e na le ringwaga jhe ri leshome le boberi ba thathoshela Jerusalema jhwaagka iye e le towelo ya moriho. ⁴³ Ya re be see iye ba hejha malatji, ba boya, mbe mhantjana Jesu a sala mo Jerusalema, mbe bazari bagwe ba be ba sha ze she. ⁴⁴ Mbe gka iye be gopola gore o mo lekokong labo, ba dogo heri leatji lothe, mbe ba moputela go bagobo le mba ba zana nabo. ⁴⁵ Ya re ba sha mbone ba boyela gatshi Jerusalema ba njhe ba moputela. ⁴⁶ Ga rihagala ya re malatji a le mararo e see iye a hetya, ba mo hithela mo tempeleng, e njhe ha gari ga barutyi, e ba reerijhe, e ba bojha ripojho. ⁴⁷ Bothe mba nde ba mo uzwa ba kgakgamajhwa ke thaloganyo yagwe, le riphetyolo jhagwe. ⁴⁸ Mbe ya re ba mbona ba kgakgamala, nnale a mo raya a re: “Ngwanagka iye o he rihelang shing jhwaalong? Bona, iro leno nda ha go bata gka boguzana.”

⁴⁹ Ena a ba raya a re: “Iye le mpatela shing? A iye le sha ze ha ke tijhwane go rula mo go ze e leng za ga Tate?” ⁵⁰ Mbe ba shegka ba thaloganya lehogko le o le bola nabo.

⁵¹ Mbe a dogo nabo, a hitha Nasaretha, mbe a rula a ba uzwa, mbe nnale ena a bologka ripolelo jhothe jhe mo pelong yagwe. ⁵² Jesu a jhwelela gka bothale le mo go goleng, le mo go ratyweng ke Morimo le batyho.

LUKE 3

Tyhero ya ga Johane wa Mokolobejhi

(Math 3:1-12; Mar 1:1-8; Joh 1:12-28)

¹ Ya re gka ngwaga wa bo 15 wa puso ya ga Kaesare Tiberio, gka Ponto Pilato e le molaori wa Jutea, le Herote e le kgoshana ya Galilea, le Filipino monawe e le kgoshana ya Iturea le ya lehatshe la Terakoniti, le Lesaniase e le kgoshana ya Abilene, ² le Anase le Kaiafase ba le baperesiti mba

* 2:41 Ekes 12:1-27; Duter 16:1-8

batyona, lehogko la Morimo la da go Johane morwa Sakaria, a le mo nageng. ³ Mbe a da mo lehatsheng lothe le le mo tyikologong ya Joretane, a rera kolobejho ya boikwathao ye isa boitjhwarelong jhwa ribe, ⁴ jhwaagka go le go kwalwe mo lokwalong lwa mahogko a moporofiti Isaia, a re:

“Lezwe la yo o kuwayo

mo nageng a re:

Baakanya mmila wa Morena,

siamisa ritsela jhagwe.

⁵ Megogoro yothe e da go katyelwa,

le rityhaba jhothe,

le rityhotya ri da go legkanyejhwa,

le jhe ri sogkamego

ri da go thamalajhwa,

ritsela jhe ri magwatya

ri da go retyehajhwa.

⁶ Batyho bothe ba da go bona pologko ya Morimo.”

⁷ Mhong a raya batyho mba bantsintsi mba iye be dile go kolobejhwa a re: “Rinoga tenye, iye la thagiswa ke anye go tjhaba bogale jho bo dago?”

⁸ Ungwa maungo uwa a tjhwanee boikwathao, mbe le shegka la simolola go ityhaya le re: ‘He na le Aberahame tatetjhwe.’ Gka gore ke le jhwelago, Morimo o nonohile go tshola majhwe uwa e rihela Aberahame batyhwana.

⁹ Shelepe she she bewe mo rityityeng jha bithare. Gyaanong ha shethare shengwe le shengwe she sha ungwe loungo lo lo molemo she da go edwa, she lathelwa molelong.”

¹⁰ Matjhwititjhwiti a batyho a mbojha a re: “Mbe he da go riha jhwang?”

¹¹ A ba hetyola a re: “Yo o na le rigkobo jhe riperi, a a abele yo ha na gkobo, le yo o na le bigyo, a a rihe jhwalo.”

¹² Ga da bakgetyhisi le bona go kolobejhwa, ba mo raya ba re: “Morutyi, tjhona he da go riha jhwang?”

¹³ A ba raya a re: “She kgetyhise tyhatya go hetyisa mma iye la go laolelwa.”

¹⁴ Le bathabani le bona ba mbojha ba re: “Mbe tjhona he da go riha jhwang?” A ba raya a re: “Le she bogise nngwe, le gona she tsholele nngwe shengwe gka tsietso. Mbe le ityumelele tyuelo yeno.”

¹⁵ Ya re batyho ba le mo tjholohelong, mbe bothe ba akanya mo ripelong jhabo gka ga Johane, gore a too ke Keresete. ¹⁶ Johane a ba raya bothe a re: “Nna ke le kolobejha gka maze, mbe go da yo o nonohile bogolo mo gono, yo kgole ya biragko zagwe ke sha tjhwanena go e bohonona. O da go le kolobejha gka Moya wo o Boitshepo, le gka molelo. ¹⁷ Yo loselo lwagwe o lo tjhwere gka sheata. Mbe a heherele mo shebowaneng shagwe, a be a phutyhele mabele mo shehaleng. Mbe a tshube moroko gka molelo wo o sha rimego.

¹⁸ A rula e rerela batyho mahogko uwa molemo e ba ha rikgagkololo. ¹⁹ Mbe kgoshana Herote, gka iye a gagkalelwa ke Johane gka nthā ya ga Herodiase mosari wa ga Filipino monawe, le gka nthā ya bilo zothē ze bi bosula ze Herote iye a bi riha, ²⁰ a otjejha bilo zothē ze gka go hitjejha Johane mo itung ya kgoleshelo.

Kolobejho ya ga Jesu

(Math 3:13-17; Mar 1:9-11)

²¹ Ya re batyho bothe be sina go kolobejhwa, ya re Jesu le ena e kolobejhwa, a rapela, legorimo la aramologa. ²² Moya wo o Boitshepo wa holoshela mo goye o bopeshile jhwaagka lephoi. Mbe ga jhwa lezwe mo legorimong, le re: “O Morwaagka yo o ratyegago, yo ke go ityumelelago.”

Loshitja lwa ga Jesu

(Math 1:1-17)

²³ Jesu ha e simolola go ruyā, iye e na le ringwaga jhe ri gka rula 30, mbe jhwaagka iye go gopolwa, iye e le morwa Josefe, morwa Heli, ²⁴ morwa Mathate, morwa Lefi, morwa Meleki, morwa Janai, morwa Josefe, ²⁵ morwa Matathie, morwa Amose, morwa Nahume, morwa Eseli, morwa Nagai, ²⁶ morwa Maathe, morwa Matathiase, morwa Semeine, morwa Joseke, morwa Jote, ²⁷ morwa Joanane, morwa Rese, morwa Serubabele, morwa Shealetiele, morwa Neri, ²⁸ morwa Meleki, morwa Adi, morwa Kosame, morwa Elematame, morwa Ere, ²⁹ morwa Jesua, morwa Elisere, morwa Jorime, morwa Mathate, morwa Lefi, ³⁰ morwa Simeone, morwa Jutase, morwa Josefe, morwa Joname, morwa Eliakime, ³¹ morwa Melea, morwa Menne, morwa Matathe, morwa Nathane, morwa Dafite, ³² morwa Jese, morwa Obete, morwa Boase, morwa Salamone, morwa Nashone, ³³ morwa Aminatabe, morwa Arani, morwa Hesperone, morwa Perese, morwa Juta, ³⁴ morwa Jakobe, morwa Isake, morwa Aberahame, morwa Tera, morwa

Nahore,³⁵ morwa Saruge, morwa Reu, morwa Pelege, morwa Ebere, morwa Shela,³⁶ morwa Kainane, morwa Arefekesate, morwa SHEME, morwa Noa, morwa Lameke,³⁷ morwa Methusela, morwa Enoke, morwa Jarete, morwa Mahalalele, morwa Kainane,³⁸ morwa Enose, morwa Sethe, morwa Atame, morwa Morimo.